

CHÊ BIADE UNITÂT...

Tai comizis, te propagande minude e sui sfueis cuasi ducj i autonomiscj nostrans si sbracin a zurâ e sperzurâ che l'ordenament regjonâl "dentri dal cuadri de unitât taliane" nol à di rompi nè di indebulî la trezadure unitarie dal paîs, ma ch'al à anzit di rinfuarcîle.

I unitaris, di ogni colôr, no si lassin trop convinzi di chestis promessis, sigûrs che il lengaç dai autonomiscj al è nome un spieli pes odulis, un espedient par fâ proselits, par cuietâ i scrupui patriotics de plui part dai furlans e par vinci la partide a Rome.

O crodìn che i unitaris sul stamp dal av. Linusse, a vebin reson.

L'unitât taliane, come che e je stade imbastide dal '61 e mantignude fintremai cumò, e je un fat puramentri pulitic, une etichete esteriôr, une robe sfuarçade, une vernis, une parvence tignude sù di une sole pegnule, chê dal acentrament burocratic e militaristic, e nudride cun inizions e scligadis di propagande nazionalistiche. Gjavait il sgambi dal personâl burocratic, di un cjâf a chel altri de Penisule; tirait vie lis prefeturis e lis cuesturis metudis simpri tes mans di forescj; tocjait l'ordenament des scuelis cun dute la messedance di mestris e professôrs e cui libris di test severamentri controlâts e dumiestiâts "ad usum Delphini"; rompeit la trame o l'urdît des aministrazions incjadenadis al centri; lassait un fregul di respîr aes lenghis e dialets, aes leteraduris locâls, ae culture storiche, demologjiche, filologjiche, artistiche di ognidune des regjons; intune peraule, butait sot i pîts chês diretivis segretis che il guviar talian subite dopo l'unificazion politiche al veve diramadis ai siei organisims e che la ditature fasciste e veve metudis integralmentri in pratiche, e o viodarês dulà che e va a finî cheste raze di unitât.

Nol covente fevelâ di autonomiis pulitichis, di podestâts legjislativis aes assembleis regjonâls; al baste ancje nome un fregul di decenitrament aministratîf, une cualchi esclusion dal personâl forest te direzion dai afârs regjonai, par butâ cui pîts par aiar chest cjiscjel di cjarte. Parcè che nol à nè un fundament etnic (come che lu à la Gjarmanie e la Russie), nè un fundament storic (come che lu à la France), nè un fundament gjeografic, nè un vêr fundament linguistic (la lenghe taliane leterarie e vîf nome tes scuelis, tra i leterâts e i impiegâts, par ordin superiôr: il popul al fevele, in Italie, almancul cualtri veris lenghis e une infinitât di dialets diferentissims): al à nome il fundament retoric e vueit di chel concet di nazion, ch'al è nassût îrlaltri e ch'al ven strombonât desperatamentri des ocjis dal Campidoglio.

L'unitât taliane, imbastide dopo de mitât dal '800, e veve di jessi implantade suntun altri teren plui salt, plui sigûr, plui pusitîf, come che a son stadis implantadis altris unitâts tal secul passât: suntun teren economic, sociâl, realistic, cuntun fregul di inteligjence e di sens pratic, e no su lis peraulis che a son fati di flât imberdeât tal gargat o tai dincj o tai lavris.

La France, la Spagne, l'Inghiltere, a puedin ancje vê un nazionalisim parcè che son nazions, che a àn mil agns di vite e di cussience nazionâl, nassudis in tims cuant che il re, la patrie, l'esercit, la vuere a vevin un valôr, un significât, une sostanzie che cumò no àn plui, madressudis in secui di lotis coletivis, morestadis di provis di ogni fate, induridis e saldadis dal timp e dai avveniments.

Ma l'Italie no pò simiotâ chês nazions: no pò copia di lôr. E je stade metude adun - par amôr o par fuerce - in altre clime e in altris moments, in mieç di un'altre realtât storiche, di altris dibisugnis, di altris dificultâts. Invezi di cjalâ l'esempli di chês nazions e veve di tignî di voli lis unitâts gnovis e il lôr implant: magari il Brasîl o il Messic che, par tant diferentis che a fossin lis lôr cundizions, a jerin simpri plui vicinis aes nestrîs che no chês de France da l'étât dai Carulins, o chês dal imperi di Dioclezian.

E cumò, une des dôs: o che si pastane une unitât di altri gjenar su la base di concezions modernis, mandant a trai il pari Enèe, la love, lis legjons cuadradis, la leghe lombarde, il "Princip" di Machiavelli, Balilla, i Cjarbonârs e dutis chês fotis; o che in pôc timp, par vie des autonomiis, o par vie dai partîts e des internazionâls o par vie des bombis atomichis l'Italie e sarâ nome une espression storiche, come la Macedonie di Filip o l'Assirie di Nabucodonosor o la Turchie di Soliman.

E chei che a tegin dûr a pensâ l'unitât di Mazzini o dal Manzoni, ("Soffermati sull'arida sponda...") o dal Fas Litori, a àn reson di vê pôre e di fê profeziis apocalitichis; il lôr idul al è dut carulît e tarmât e al pò fâ la tombule di un moment a l'altri.

(Patrie dal Friûl 1947)